

**Leeter masa
Piyer
ma wuzlala nga dey cew
Mey da ray
Leeter masa Piyer ma
wuzlala nga dey cew**

Ara Simanɗw Piyer, ndaw-meslɔrey nga Yesu Kɔriste, ma wuzlala saya. A wuzlalatarɔ ngada ndɔhay nga Yesu daa Egɔliz hay da bɛla tabiya.

A wuzlala leeter e na, maja a sɛra gweegwe cay a mɛcey. A wudɛy fa dɔba anɗa na, ndɔhay a sɛrfadamara meesɛrkedey anɗa (1.13-14). Daa nɗene, ndɔhay ma tɔba mey nga Yesu nɗeeme ga ta mɛcam sem, ama kwa Yesu ta vɔhwa daa ba arɗɗ. Da ray nɗene, ndɔhay ga ray ata fa hɛbey maja. Asaya, ndɔhay maa sɛrkada ndɔhay ta membɛrzley lenɗ ndɔhay maaya ba hay ta samawa la a wuzlah ndɔhay daa Egɔliz. Aa sanɗɔram a ray ndɔhay ma ka cek ta cɔved e.

Daa fasɔlawal 1 Piyer a lɔvtar nga kam gɔdanɗ nga nɗey daa metɔbey mey nga Gazlavay anda Gazlavay ma zɔlta. Daa fasɔlawal 2 a lɔvtar nga pam lenɗesl ta ndɔhay maa sɛrkadam mey masa fara fara ba, asaya, nga pam lenɗesl ta ndɔhay maaya ba hay. Daa fasɔlawal 3 a lɔvtar nga wam vaw fa menɗey ata, si a vɔldamara ray ata fara fara a Gazlavay maja Yesu fa da vɔhwa. Yesu a wuswa vaw fiyaw ba na, maja a wudɛy ndɔhay

a mbəɖdamara menjey ata, asaya, a wuɖey kwa ndaw pal aa zəɖey ba (3.9, 11).

Daa leeter e keɖe na, mey mekele mekele daha nga vɔley gəɗaŋ a ndəhay:

Mey da ray Gazlavay ma vɔɓndakwar cek hay cəpa nga jəɓndakwar (1.3-4)

Mey da ray ndəhay ma da tɔram nga ndəhay majaratakaya masa ta gəɗaŋ (1.5-8)

Mey da ray ɗar pal ta mevey pal, ata letek fa Gazlavay (3.8)

Mecey-har

¹ Ara yah *Simanɗw *Piyer ma wuzlalakwara leeter keɖe, yah ndaw ma ka slɔra nga *Yesu *Kəriste, asaya, yah ndaw aŋga meslərey.

Leeter e keɖe ara ŋgada akwar ndəhay ma tɔba mey nga Yesu. Daa metəbey mey a na, akwar ta hətam cek maaya la anda ala. Ya tɔbkwa mey nga Yesu na, maja Yesu a vɔley cəved ŋgada kwa waawa nga ləhey, a weley ndaw ta weley ba. Yesu Kəriste na, ara Gazlavay, ndaw ma ləhdandakwar.

² Anja *Gazlavay nga pəskwar mey, nga njadakwar daa zazay aŋga ma fəna ma fəna maja akwar ma səmra Gazlavay ta Bay aləkwa Mahura Yesu maaya maaya cay.

Ndəhay nga Gazlavay a da njam na, kwara?

³ Gazlavay ta vɔɓndakwar cek hay cəpa la ta fa gəɗaŋ aŋga amba ya njakwa macəmkaya ta aŋga, ya kakwa cek fara fara anda aa ma wuɖey. Ara Gazlavay a ma wuzdandakwara ndaw masa

ma zəlndakwar amba ya sərkwā gədan̄ an̄ga fara fara, asaya, amba ya hətkwa maaya an̄ga.

⁴ Ara ta fa gədan̄ an̄ga len̄ ta fa maaya an̄ga ha, an̄ga ma vəlndakwar cek hay maaya mahura masa aa ma ləvey a da vəldandakwara dəga zleezle heyey. Cek hay a na, maaya kalah, a fəna cek hay tabiya. A ka anda keđe na, amba ta fa cek hay a keđe na, ka ləham fa mewulkey maaya ba ma nəsa ndaw da bəla keđe. Asaya, a ka anda keđe amba ka təram ndəhay ta mevel maaya anda an̄ga.

⁵ Maja ηgene, kam gədan̄. Daa menjey akwar na, kam cek ta cəved e maja akwar ma pamara Yesu *Kəriste ηga ndaw akwar fara fara. Da masa akwar fa kamara kəne na, kam gədan̄ saya ηga sərey Gazlavay ta ηga sərey cek masa aa ma wudəy.

⁶ Da akwar ma sərmara cek hay masa Gazlavay ma wudəy la na, maaya, ka wam vaw fa ray akwar may. Da akwar ma wam vaw la fa ray akwar na, maaya, ka bəsmara banay hay tabiya may. Da akwar ma bəsmara banay hay tabiya la na, maaya, ka vəldamara ray akwar fara fara a Gazlavay anda an̄ga ma wudəy may.

⁷ Da akwar fa vəldamara ray akwar fara fara a Gazlavay na, maaya, ka wudəy vaw da wuzlah akwar anda məlman̄ hay may. Da akwar fa wudəy vaw da wuzlah akwar na, maaya, ka wudməta ndəhay mekele hay may.

⁸ Da akwar fa kamata cek hay a keɗe ma fəna ma fəna na, ŋgene, ka tɔram ndəhay masa ta gədaŋ ma ka cek maaya la. Anda keɗe, ka sɛrmara Bay aləkwa Mahura Yesu Kəriste la ma fəna.

⁹ Ama ndəhay ma kamata cek hay a keɗe ba na, a hətmar dey maaya maaya ba, ata anda wulaf hay. Ndəhay a ŋgene, Bay Gazlavay ta mbəkdatara mebɔrey ata masa zleezle sem na, a sɛrfadamara saba daw?

¹⁰ Məlma adaw hay, Gazlavay ta zəlkwar sem, ta walakwar sem. Maja ŋgene, kam gədaŋ ma fəna saya amba ka njam maaya maaya anda Gazlavay ma zəlkwar, ta aa ma walakwar ŋgene. Da akwar fa kam cek hay anda ŋgene na, ka zlanɗadam daa cəved ŋga Gazlavay daa ba.

¹¹ Anda keɗe, Gazlavay a vəlkwar cəved la ta meesəmey amba ka mbəzam aa mewey ŋga Yesu Kəriste ma da njey ŋga sɛrmataw. Yesu Kəriste na, Bay aləkwa Mahura, ndaw ma ləhdandakwar.

¹² Ara maja ŋgene, kwa ka sɛrmata cek hay a, asaya, kwa akwar fa tɔbmara mey fara fara masa akwar maa sɛrkadamara cay maaya maaya na, ya fa sɛrfadakwara cek hay a cəŋga.

¹³ Anda keɗe, daa masa yah daha ta dey da bəla keɗe na, maaya na, ya sɛrfadakwara cek hay a saya amba kaa zəɗdamara daa ray ba.

¹⁴ Ya fa sɛra mamba cay ya mɔcey anda Bay aləkwa Mahura Yesu Kəriste ma wuzdiwa.

1:11 1.11 2Tm 4.18; **ndaw ma ləhdandakwar:** 2.20; 3.18; Tit 3.6 **1:12 1.12** Jud 5 **1:14 1.14** 2Kwr 5.1; 2Tm 4.6; Jan 21.18-19

15 Anda keđe, ya kəđey vaw la ta gədaŋ ađaw cəpa amba kwa daa masa yah daa saba na, ka gwamara ŋga sərfađamara cek hay a mandaw mandaw.

Mey da ray mewedey ma sawa a ray Yesu

16 Ahaw, zleezle, ala ta kadamakwara mey da ray masawa ŋga Yesu *Kəriste Bay aləkwa Mahura la, ndaw masa ta gədaŋ. Ya kadamakwara ha na, anda ndəhay ma kam mamba saw kəne ba, ama ala ta dey ala, ya ta hətmar gədaŋ aŋga la, gədaŋ a, aa mahura.

17 Fara fara, Gazlavay Papan ta həslar ray la, ta slərwa mewedey la a ray a daa masa đay ŋga Gazlavay Mawaca-waca ma cənwa, ma ləvey: «Kəđe he, ara Bəzey ađaw masa yah ma wuđa kalah, ya faa səmey ga da ray a.»

18 Daa masa ala bama ta ata Yesu a daa ray ŋga aŋgwa ŋga Gazlavay na, đay a ma cənwa da gazlavay da vad la, ala ma cəndamara la ta sləmay ala.

19 Ala ma cəndamara đay a ŋgene na, ta vəlndar gədaŋ la saya ŋga təbey mey ŋga ndəhay ma təla mey ŋga Gazlavay ma kadamara zleezle. Maaya na, ka pam leŋgesl fa mey ata ha maja mey a na, aŋga anda petərla ma wedey daa slam-ləvaŋ haa slam ma wurey, haa batay * ma

1:16 1.16-18 Mt 17.1-8 * **1:19 1.19** batay: Ara «wur-
zla-baŋgay» ta mey Məkaŋ. A wuđey ŋga ləvey Kəriste. Nəka
daa CWJ 22.16.Aa guzley da ray mavəhwa ŋga Yesu a bəla, da
daa ba, da ray pas masa ndaw ma təba Yesu aa mevel aŋga.

bawa. Fa dɔɓa ha, ka da hɔtmatar cek hay tabiya maaya maaya.

²⁰ Ya fa lɔvkwar, mey nga ndɔhay ma tɔla mey daa dɛrewel nga Gazlavay zleezle na, kwa ndaw pal ma gwa nga wuzda ta gɔɗan anga daada na, daa ba. Kede ara mey mahura nga sɛrey teesed ɗagay.

²¹ Mey nga ndɔhay ma tɔla mey nga Gazlavay daa dɛrewel e na, ara mewulkey nga ndaw-magɔɗan ba, ama ara *Mesɔfney nga Gazlavay ma vɔltar gɔɗan nga wuzda mey ma sawa ta fa Gazlavay.

2

Mey da ray ndɔhay maa sɛrkada ndɔhay ta membɔrzley

¹ Zleezle na, ndɔhay ma pamara ray ata nga ndɔhay ma tɔla mey nga Gazlavay daha da wuzlah ndɔhay *Israyel hay. Ndɔhay maa sɛrkada ndɔhay ta membɔrzley a samawa la a wuzlah akwar kɛne may. A da samawa na, ngaa sɛrkadamakwar mey membɔrzley ngaa zɛɗɗakwar. Anda kede, a da rɛsmara Bay Mahura Yesu, ndaw ma lɔhdata. Maja ngene, Gazlavay a sɛrdata banay la fiyaw, aa zɛɗɗata la.

² Ndɔhay ga a tɔɓmatara mey ata la, a da kam cek malamba anda ata. Ndɔhay a daa guzlam mey maaya ba da ray cɛved masa fara fara nga

Gazlavay maja ata fa kam cek malamba anda ndəhay ma mbərzley heyey.

³ Ndəhay maa sərkada ndəhay ta membərzley ŋgene na, a kam dey fa cek ŋga ndəhay kalah. A fəcmakwara cek akwar hay cəpa ta mey ata hay membərzley ŋgene. Dəga zleezle Gazlavay ta dəsla sariya ata cay. Anda keđe, a daa zədfdata fiyaw.

⁴ Ya ləvey anda keđe maja kwa maslan hay ŋga Gazlavay da vad masa ma kam mebərey ma!, Gazlavay ta sərfatar dey-ceceh daa ba, ta kəzlata sem aa slam mesərey banay. Fetede, majəwtakaya daa ləvan ta calalaw, fa səkwmaras pas masa Gazlavay ma da dəsla sariya da ray ata.

⁵ Kwa ndəhay masa zleezle ma kam mebərey may, Gazlavay ta sərfatar dey-ceceh daa ba. Gazlavay ta pawa var la mahura, yam ta rəhda bəla la, bəla masa ndəhay malamba ga da hwađ a, yam ta həlta sem cəpa. Si Nəwe, ndaw maa guzltar a ndəhay ŋga kam cek ta cəved e, ta ndəhay da way anga hay maasala ma ləham gway.

⁶ Asaya, Gazlavay ta katar sariya la ŋgada ndəhay daa berney ŋga *Sadawm ta ŋga *Gwamar. Ta wawurta berney hay a sem ta ndəhay da hwađ a cəpa kəlmedfek! Anda keđe, Gazlavay fa wuzda ŋgada ndəhay masa malamba na, a da sərdata banay kəne.

⁷ Ndaw daa berney ŋga Sadawm a daha, mezəley *Lut. Anga ndaw maaya ma ka cek ta

2:3 2.3 1Tm 6.5 **2:4 2.4** 1Tm 3.6; Jud 6; CWJ 20.1-3; Jud 6
2:5 2.5 3.6; 1Pi 3.20 **2:6 2.6** MC 19.24-25; Lk 17.29; Jud 7

cøved e. Mevel anğa fa cey kalah da ray ndøhay ma kam cek malamba. Anğa na, Gazlavay ta løhda sem daa berney a

⁸ maja anğa ndaw maaya. Aa manjakaya ta way da wuzlah ndøhay a, anğa fa høtatar cek hay malamba masa ndøhay a ma kamara, asaya, fa cønda mey hay maaya ba masa ndøhay a maa guzldamara. Cek hay a tabiya kedø fa car mevel kalah mandaw mandaw maja anğa na, ndaw ma ka cek ta cøved e.

⁹ Anda kedø, Bay Gazlavay aa ta gødan nga løhdata ndøhay masa ma namar ray. Asaya, aa ta gødan nga pata ndøhay ma kam cek malamba ta cakay amba a sørdana banay ta pas masa anğa ma da katar sariya.

¹⁰ Ma da søram banay kalah na, ndøhay ma kam cek malamba saw anda vaw ata ma wudøy, a tømara Bay Gazlavay nga wey da ray ata ba.

Ndøhay maa sørkada ndøhay ta membørzley heyey na, a kam cek anda ata ma wudam, a zlapam. A zluram nga cødmata maslan hay nga Gazlavay daa slam-mewedøy da vad * ba.

¹¹ Maslan hay nga Gazlavay da vad na, a fømata ndøhay maa sørkada ndøhay ta membørzley heyey ta gødan. Ama maslan hay a fa cødmata ndøhay mahura hay a fa mey nga

2:7 2.7 MC 19.1-16 **2:9 2.9** Jøw 4.7; 1Kwr 10.13; CWJ 3.10

* **2:10 2.10** maslan hay nga Gazlavay daa slam-mewedøy da vad: Ndøhay siya a wulkam ara maslan hay nga Gazlavay, siya hay a wulkam ara maslan hay maaya ba ma røsmara Gazlavay zleezle. Nøka Jud 8-10. Ndøhay mekele a wulkam ara ndøhay mahura hay masa da cakay Gazlavay. **2:10 2.10** Jud 7-8

Bay Gazlavay daa ba.

¹² Ndəhay a na, a kam cek hay saw anda cek hay nga ley manjar lengesl masa makatakaya nga kərzey ta nga kədəy. A cədam cek hay masa ata ma səmara ba. Anda kədə, a da məcam saw anda cek hay nga ley.

¹³ Ta sərdamata banay la ta ndəhay. Anda kədə, Gazlavay a da sərdamata banay maja may. Maa səmdata na, ara mekey cek malamba fa mey nga ndəhay gway, kwa taa pas. Daa masa akwar fa zəmam cek bama, ata faa səmam nga batamakwar na, ara cek maaya ba, ma ka hwaray.

¹⁴ A wulkam na, si nga ley vaw saw da palah gway. Mekey mebərey na, a bəltar mey ba. A batam nga key mebərey na, ndəhay masa ta gədan pəreh daa mey nga Gazlavay. Ara ndəhay ma wudam cek mandaw mandaw na, si ngada ata gway. Ndəhay a na, Gazlavay ta nəsta sem.

¹⁵ Ta zlanğadam sem daa cəved nga Gazlavay, a lam cəved masa maaya ba anda nga ndaw mezəley Balam, bəzey nga Bawzar. Balam a na, ara ndaw zleezle ma key cek maaya ba nga hətey dala.

¹⁶ Balam a na, ara *ndaw ma təla mey nga Gazlavay. Ama Gazlavay ta mbədar ray la maja aa ma nar ray ba, haa madi-zəngwaw, cek ma gwa ngaa guzley ba ma! aa guzlar anda ndaw. Aa guzlar na, nga təka sləra anğa maaya ba saw ngene.

¹⁷ Ndəhay maa sərkada ndəhay ta mēbərzley a na, ata anda wurak masa yam maa səkey sem da hwad a. Asaya, ata anda gazlavay nga var masa memed ma təra, ma pey var ba. Gazlavay ta dīytar slam cay daa ləvanj mebək-bək e.

¹⁸ Ata faa guzlam mey hay mezlepey saw kəne. A kam cek malamba saw anda ata ma wudam. Anda kedē, fa batamata ndəhay masa ma ləhmawa təlām dasi har nga ndəhay masa ma sərmara cəved nga Gazlavay ba.

¹⁹ Ndəhay maa sərkada ndəhay ta mēbərzley a na, a ləvmatar a ndəhay kwa waawa a da wey ray anğa. Anja nğene, ata ray ata ha na, ata beke hay nga mebərey, maja kwa cek wura wura fa wa ndaw na, ndaw aha anğa beke nga cek aha.

²⁰ Ndəhay ma səpa Yesu *Kərīste Bay aləkwa Mahura, ndaw ma ləhdandakwar na, ta ləham cay daa cek hay maaya ba cəpa da bəla ma nəsa ndaw. Ama fa dəba ha, da ndəhay a, a mbəkdamara ray ata nga key cek maaya ba ha cəngə na, nğene, cek aha fa wata. Anda kedē, menjey ata a da nəsey ma fəna masa nğeeme.

²¹ Nğada ata na, nğama ta sərmara cəved maaya nga Gazlavay kedē daa ba səlāk, da ray masa ata ma sərmara cay, a mbəkdamara aa walañ, a namar ray a *mewey nga Gazlavay saba.

²² Cek aha kedē anğa letek anda mey a daha ma ləvey: «Gədey a kərɔfadərwa cek, fa dəba ha, a vəhey, a zəma saya.» Asaya, anda mey a daha

ma løyey: «Vetem mapørkaya maaya maaya na, a vøhey, a ney aa ndøleb.»

3

Mey da ray mavøhwa nga Bay Mahura

¹ Jam adaw hay, keðe he ara leeter nga dey cew e masa yah ma wuzlalakwara. Daa leeter hay cewete keðe na, ya fa sørfadakwara mey masa akwar ma sørmara cay amba ka wulkam maaya maaya da ray a.

² Ya wuðey na, ka sørfadamara mey masa ndøhay ma tøla mey nga Gazlavay zleezle ma wuzdamara. Asaya, sørfadamara mewey hay nga Bay aløkwa Mahura, ndaw ma løhdandakwar. Aa guzlkwar ta mey ndøhay anga hay meslørey masa anga ma slørddata fa akwar ngaa sørkadamakwara.

³ Teesed na, ya wuðey ka sørmara, masa gweegwe cay bøla a ndøvey na, ndøhay ma kam cek saw anda ata ma wuðam a samawa la. A daa sanğøram a ray akwar,

⁴ a da løyam: «Naa! Yesu a løyey a vøhwa la, kaa aa dama døba ama? Haa papan nga papa aløkwa hay a møcam, ama ta vøhwa daa ba. Yaw, døga nga mezley nga bøla haa wure keðe kwa cek ta mbøðey daa ba.»

⁵ Ndøhay maa guzlam anda keðe na, cek pal daha ta sørfadamara daa ba tesuðe. Cek a na, ara Gazlavay ma løma slam da vad ta slam da hwayak døga zleezle ta fa mey anga masa anga

maa guzlda. A ləma slam da hwayak na, ta yam. A wunkata yam ta hwiyak wal wal.

⁶ Asaya, Gazlavay a pasla bəla zleezle, a rəhda ta yam. A ka kəne na, ta fa mey anğa meeguzley.

⁷ Ara ta fa mey anğa meeguzley a, slam da vad ta slam da hwayak masa wure keđe a njeý haa pas masa Gazlavay ma da katar sariya ngada ndəhay ta mebərey ngaa zəđdata. Ta pas a ngene, slam da vad ta slam da hwayak a daa wurey ta awaw.

⁸ Ama jam adaw hay, cek pal daha na, si ka sərfadamara. Sərmara, fa Bay Gazlavay na, đar pal anda mevey gabal, mevey gabal may anda đar pal.

⁹ Ndəhay siya a wulkam cek masa Bay Gazlavay ma ləvey a ka la heyey na, a wusey vaw nğa ka ba. Ara kəne ba. Anğa fa səkwakwar ta dək-vaw maja a wuđeý kwa ndaw pal aa zəđeý ba. Ama a wuđeý na, kwa waawa a mbəđda menjeý anğa, a mbəkda mekey mebərey.

¹⁰ Pas masa Bay Mahura ma da vəhwa na, a da sawa dərfaý, anda ndaw-mayal. Ta pas a ngene, ndəhay a da cənam cek ma rəvey ta gədañ. Daa ngene, slam da vad a da yeyihey. Awaw a da wawurta cek hay da gazlavay da vad tabiya. Asaya, bəla ta cek hay da hwađ a cəpa a da yeyihey*.

3:5 3.5 MC 1.6-9; Heb 11.3 **3:6 3.6** 2.5; MC 7.11-21; Mt 24.37-39

3:8 3.8 Ps 90.4 **3:9 3.9** 3.15; 1Tm 2.4 * **3:10 3.10** a da yeyihey: Ndəhay siya a wulkam mey Gerek a ləvey: «bəla ta cek hay da hwađ a cəpa na, Gazlavay a da katar sariya.» **3:10 3.10** 1Tes 5.1-2; 1Pi 4.7

¹¹ Da cek hay a tabiya a daa zədam anda kefe na, maaya menjey akwar a mbafar a Gazlavay. Si ka völdamara ray akwar fara fara a Gazlavay anda anga ma wudəy, ka səpmara Gazlavay a ta cəved e.

¹² Akwar na, fa səkwmarə pas masa Gazlavay ma da sawa ŋga kar sariya a bəla. Anda kefe, kam cek ta gədan akwar cəpa amba dar a, a wuswa fiyaw fiyaw. Ta pas a ŋgene, slam da vad a da wewurey, aa yihey cəpa, awaw a da wawurta cek hay da gazlavay da vad tabiya.

¹³ Gazlavay ta ləvndakwar la a da vəndakwar slam da vad ta slam da hwayak mekele mawiya masa cek hay cəpa da hwad a, a da key ta cəved e. Kefe he ara cek masa aləkwa ma səkwakwa.

¹⁴ Ara maja ŋgene, jam adaw hay, ya fa ləvkwar, daa masa akwar fa səkwmarə dar a ŋgene na, kam gədan amba ka njam akwar ndəhay manjar mebərey, ndəhay maaya fa mey ŋga Gazlavay, asaya, amba ka njam daa zazay ta anga.

¹⁵ Sərmara dəba taw, Bay aləkwa Mahura Yesu *Kəriste na, fa səkwakwar ta dək-vaw, ta vəhwa fiyaw daa ba, maja a wudəy ndəhay tabiya a mbədamara menjey ata amba a ləham daa mebərey. Kefe he ara cek masa məlma aləkwa Pawl, ndaw masa aləkwa ma wudkwa kalah, ma wuzlalakwara daa leeter anga hay. A wuzlalakwara na, ta ləngesl masa Gazlavay ma völdara.

¹⁶ Daa leeter hay masa aa ma wuzlalata cəpa na, da aa faa guzley da ray mey a kefe na,

aa guzley letek kōne. Daa leeter anġa hay a na, mey hay ta banay daha nġa cōney. Anda keċe, ndōhay marōzltakaya leŋ ndōhay ma sōra cek maaya maaya ba na, a mbōċdamara mey a wal, a wuzdamara ta cōved e ba, anda ata ma wuzdamara mey hay mekele daa ċerewel nġa Gazlavay ta cōved e ba may. Ara anda keċe, ata ma handamawa mey a ray ata nġaa zōċdata.

Mey nġa madagway-dakw

¹⁷ Jam aċaw hay, akwar na, ka sōrmara, ala ma pamakwar leŋgesl cay da ray cek hay a. Da ray nġene, wam vaw fa ndōhay ma nōsa mey nġa Gazlavay. Ka da vōlmatar cōved nġa batamakwar ba. Da daa ba na, a da zlanġaċadamakwar daa cōved masa akwar majaratakaya da hwaċ a nġene †.

¹⁸ Ama sōrmara Yesu *Kōriste Bay alōkwa Mahura, ndaw ma lōhdandakwar, anda akwar ma kamara mandaw mandaw, amba a slōrwa maaya anġa a ray akwar ma fōna ma fōna, asaya, amba ka sōrmara Yesu a ma fōna ma fōna. Anja ndōhay nġa hōlmamara dōga wure keċe haa nġa sōrmataw. [*Amen.]

† **3:17 3.17** cōved masa akwar majaratakaya da hwaċ a nġene: A wuċey nġaa guzley da ray metōbey-mey ata. **3:17 3.17** Mk 13.5; 1Kwr 10.12; 1Pi 4.7 **3:17 3.17-18** Jud 24-25 **3:18 3.18** 1.11

Mofu-Gudur
The New Testament in the Mofu-Gudur language of
Cameroon: Mejəwey-mey Mawiya
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

2b021919-36cf-59da-a35f-10c5e5548811